

শিশুতোষ সিরিজের দশম সংখ্যা
আষাঢ়—১৩২৮ সাল।

শিশুতোষ সিরিজ

সম্পাদক
কুমার হিম্মতি

রানকেশ্বর

আরো

গল্প

১
১৪।

সূচী ।

চাষার প্রতিজ্ঞা	.	.	.	১
কল্লবৃক্ষ	.	.	.	৭
পুরোহিত ও গোয়ালিনী	.	.	.	৯
কাঠুরে ও সন্ন্যাসী	.	.	.	১২
ব্যাসদেবের নদী পার	.	.	.	১৫
জটিল ও দীনবন্ধু দাদা	.	.	.	১৮
ভণ্ড সেকরা	.	.	.	২০
দুই ভাই	.	.	.	২৩
সাধু ও ভগবান	.	.	.	২৫
আকবর ও ফকির	.	.	.	২৮
ভামাক খাওয়া	.	.	.	৩২
তাঁতীর বিপদ	.	.	.	৩৪
সন্ন্যাসী ও জমিদার	.	.	.	৩৮
জেলের মাছ চুরি	.	.	.	৪০
চাষার ছেলে	.	.	.	৪২
পুরোহিতের ছেলে	.	.	.	৪৪

ৰামকৃষ্ণৰ আৰো গল্প !



চাষাৰ প্ৰতিজ্ঞা

এক দেশে একবাৰ ভয়ঙ্কৰ অজন্মা হইয়াছিল ।
বহুকাল বৃষ্টি না হওয়ায়, জলের অভাবে ক্ষেতের
ফশল শুকাইতে আরম্ভ করিল । দুই এক দিনের
মধ্যে জল না পাইলে একটি ফশলরও বাঁচিবার
আশা রহিল না । নালা কাটিয়া নদী হইতে ক্ষেতে
জল আনিবার জন্য সকল চাষাই ব্যস্ত হইয়া উঠিল
এবং ভোর হইতে না হইতে কোদাল লইয়া ক্ষেতে
যাইয়া নালা কাটিতে শুরু করিয়া দিল । বেলা
দুপুর বাজিবার পূৰ্বেই অনেকেই স্নান আহার
করিবার জন্য বাড়ী ফিরিল কিন্তু একজন চাষা

রামকৃষ্ণের আরো গল্প

তাহার কশলগুলি বাঁচাইবার জন্য স্নান আহার ভুলিল, বেলায় দিকেও চাহিল না, নদীর জল ক্ষেতে আনিবার জন্য ক্রমাগতই নালা কাটিয়া চলিল। এদিকে সেই চাষার স্ত্রী দুপুর বাজিয়া গেল তবুও স্বামীকে বাড়ী ফিরিতে না দেখিয়া মেয়েটির হাতে এক বাটী তৈল দিয়া মাঠে পাঠাইয়া দিল। চাষার মেয়ে মাঠে আসিয়া বলিল, “বাবা দুপুর যে বাজে। মা তৈল পাঠাইয়া দিয়াছে। তৈল মাখিয়া স্নান করিতে যাও।”

চাষা তখনও নালা কাটিতেছিল, সে কণ্ঠ্যার কথার উত্তরে বলিল,—

“মা, আজ ক্ষেতে জল আনিতে না পারিলে কশল একটীও বাঁচিবে না, জল ক্ষেতে আজকে আনা চাইই। এখন আমার নাইবার খাইবার সময় নাই।”

দুইটা বাজিয়া গেল, তবুও সেই চাষার স্নান আহারের কথা মনে পড়িল না। বেলা যতই বাড়িতেছিল তাহার স্ত্রীও ততই ব্যস্ত হইয়া



‘বলি, হ্যাঁগা, আজ এখনও কি স্নান করিবার সময় হয় নাই?’

পৃষ্ঠা

চাঁদার প্রতিজ্ঞা

উঠিতেছিল। রান্নাবান্না সমস্তই ঠাণ্ডা হইয়া গেল, সে আর কতক্ষণ এমন ভাবে ভাত কোলে করিয়া বসিয়া থাকিবে? বসিয়া বসিয়া শেষে বিরক্ত হইয়া সে নিজেই স্বামীকে ডাকিবার জন্ত ক্ষেতে আসিয়া উপস্থিত হইল। সে স্বামীর নিকটে উপস্থিত হইয়া মহা বিরক্ত স্বরে বলিল,—

“বলি হ্যাঁগা, আজ এখনও কি স্নান করিবার বেলা হয় নাই। রান্নাবান্না জুড়াইয়া যে একেবারে হীম হইয়া গেল? তোমার সব কাজেই দেখিতে পাই বাড়াবাড়ী। নাও, ঢের কাজ হইয়াছে, এখন স্নান আহার করিতে চল। যেটুকু বাকি রহিল সেটুকু কাল করিলেই পারিবে।”

চাষা সেই দারুণ রোদ্রে গলদ ঘন্ব হইয়া প্রাণপণ শক্তিতে নালা কাটিয়া যাইতেছিল, সহসা এই কথা কাণে যাওয়ায় রাগে তাহার সর্বশরীর জ্বলিয়া উঠিল, সে কোদাল ফেলিয়া উঠিয়া দাঁড়াইল ও দ্বীপ দিকে কটমট করিয়া চাহিয়া বলিল,—

“মুখ্য, কাণ্ডজ্ঞানহীন মেয়েমানুষ, দেখিতে

রামকৃষ্ণের আরো গল্প

পাইতেছ না সমস্ত ফসল মরিতে বসিয়াছে, ফসল মরিলে তোমাদেরও যে অনাহারে মরিতে হইবে। আজ আমি প্রতিজ্ঞা করিয়াছি ক্ষেতে জল না আনিয়া জলস্পর্শ করিব না।”

স্বামীর নিকট ধমক খাইয়া চাষার স্ত্রী মুখখানি চুণ করিয়া বাড়ী ফিরিয়া আসিল। আর চাষা সারাদিন পরিশ্রম করিয়া শেষে তাহার প্রতিজ্ঞা রক্ষা করিল। সন্ধ্যার সময় নদীর জল যখন কল্কল্ করিয়া তাহার ক্ষেতে ঢুকিতে লাগিল তখন একটা অভিনব আনন্দে তাহার বুকের তিতরটাও কল্কল্ করিয়া উঠিল। সন্ধ্যার সময় বাড়ী আসিয়া চাষা তাহার স্ত্রীকে ডাকিয়া বলিল,—

“দেরে, এইবার এক ছিলিম তামাক ও তৈল দে।”

স্ত্রী তৈল ও তামাক আনিয়া দিল। চাষা মনের আনন্দে ভরপুর হইয়া তামাক খাইল তাহার পর স্নান করিয়া আসিয়া আহারে বসিল। সেই দিন সেই চাষার আর কোন ভাবনা চিন্তা

চাষার প্রতিজ্ঞা

ছিল না, সে সেদিন আহার করিয়াছিলও যেমন, ঘুমটাও সেদিন তাহার তেমনি গাঢ় হইয়াছিল।

অপর একজন চাষাও নদী হইতে তাহার ক্ষেতে জল আনিবার জন্ত নালা কাটিতে আরম্ভ করিয়াছিল, কিন্তু তাহার স্ত্রী আসিয়া বলিল, “ওগো, বেলা ঢের হইয়াছে, স্নান আহার করিতে চল।”

স্ত্রী স্বয়ং যখন ডাকিতে আসিয়াছে, তখন কি আর সে আপত্তি করিতে পারে? সে এক মুখ হাসিয়া বলিল,—

“তুমি যখন নিজে এত কষ্ট করিয়া আমাকে ডাকিতে আসিয়াছ তখন কি আর আমি বিলম্ব করিতে পারি? চল চল।” চাষা কোদাল কাঁধে করিয়া স্ত্রীর পিছনে পিছনে বাড়ী চলিয়া গেল। কাজেই তাহার নালা কাটিতে বিলম্ব হইয়া পড়িল, এদিকে জল অভাবে ক্ষেতের ফশল গুলিও মরিয়া গেল।

আহার নিদ্রা ভুলিয়া দৃঢ় প্রতিজ্ঞ না হইলে,

রামকৃষ্ণের আরো গল্প

চাষার যেমন নদী হইতে নালা কাটিয়া ক্ষেতে জল
আনা সম্ভব নয়, তেমনই ভগবান লাভের প্রবল ইচ্ছা
না হইলে ভগবানের আশীর্ব্বাদ লাভ করাও কাহার
পক্ষে সম্ভব নহে ।

কম্প বৃক্ষ

এক পথিক অনেক দূর হইতে হাটিয়া আসিতেছিল, হাটিয়া হাটিয়া ক্ষুধায় ও তৃষ্ণায় সে বড়ই কাতর হইয়া পড়িয়া এক গাছের তলায় বসিয়া পড়িল। পথিক যে গাছটার তলায় আসিয়া বসিয়াছিল, সেটা ছিল একটা কল্ল বৃক্ষ। কল্ল বৃক্ষের মজা হইতেছে এই যে, তাহার তলায় বসিয়া যে যাহা চাহিবে সে তাহাই পাইবে। পথিক সেই গাছের তলায় কিছুক্ষণ বসিয়া থাকিবার পর মনে মনে ভাবিল, যদি এখন আমি এক পেট আহার ও এক ঘটি ঠাণ্ডা জল পাইতাম তাহা হইলে আর আমায় কে পায়। পথিকের এই কথা মনে হইবার সঙ্গে সঙ্গে অমনি তাহার নিকট একপেট আহার ও এক ঘটি ঠাণ্ডা জল আসিয়া হাজির হইল। পথিকের আনন্দ দেখে কে, সে তৃপ্তি সহিত সবটা খাবার খাইয়া ফেলিল ও এক ঘটি জল খাইয়া

রামকৃষ্ণের আরো গল্প

অনেকটা সুস্থ হইল। তাহার পর কিছুক্ষণ বাদে
আবার তাহার মনে হইল, এখন যদি একটা বাঘ
আসিয়া আমাকে মুখে করিয়া লইয়া যায় তাহা
হইলে—

পথিকের কথাটা আর শেষ হইল না অমনি
একটা বাঘ আসিয়া তাহাকে মুখে করিয়া লইয়া
গেল।

ভগবানও ঠিক এই কল্প বৃক্ষের মত। যে
তাহাকে দুর্বল ও ক্ষমতাহীন ভাবে, সে সেইরূপ
অবস্থায় থাকে,—আর যে তাঁহাকে সর্ববশক্তিমান
বলিয়া বিশ্বাস করে, সে তাঁহার নিকট যাহা চায়
তাহাই পায়।

পুরোহিত ও গোয়ালিনী ।

এক গোয়ালিনী নদীর পার হইতে আসিয়া এক পুরোহিতের বাড়ীতে দুধ যোগাইত । কিন্তু খেয়া নৌকার জন্ত তাহার রোজই দুধ আনিতে বেলা হইয়া পড়িত । রোজ রোজ দুধ দিতে বেলা হইবার দরুণ একদিন ব্রাহ্মণ মহা গরম হইয়া গোয়ালিনীকে বলিলেন,—“তোর রোজ রোজ দুধ আনিতে এত বেলা হয় কেন ?”

গোয়ালিনী বলিল,—“ঠাকুর, কি করিব বলুন,—আমাকে নদীর ওপার হইতে আসিতে হয়,—খেয়া ঘাটে আসিয়া খেয়া নৌকার জন্ত আমাকে অনেকক্ষণ বসিয়া থাকিতে হয়, কাজেই বেলা হইয়া পড়ে ।”

গোয়ালিনীর কথায় পুরোহিত বলিলেন,—“ভগবানের নাম করিয়া মানুষ অনায়াসে সমুদ্র পার হইয়া আসে, আর তুই এই ছোট নদীটা পার হইতে পারিস্ না ।”

রামকৃষ্ণের আরো গল্প

গোয়ালিনী আর কোন কথা বলিল না, কিন্তু পরদিন হইতে সে ঠিক সময়েই ব্রাহ্মণের বাড়ীতে দুধ জোগাইতে আরম্ভ করিল। ইহার কিছু দিন পরে পুরোহিত একদিন আবার গোয়ালিনীকে জিজ্ঞাসা করিলেন, “হ্যাঁরে, এখন আর তোর দুধ আনিতে দেৱী হয় না কেন?”

গোয়ালিনী বলিল,—“ঠাকুর, এখন তো আর আমার খেয়া নৌকার জন্ত বসিয়া থাকিতে হয় না—আপনার কথা মত এখন আমি ভগবানের নাম করিয়া নদী পার হইয়া আসি।”

পুরোহিত গোয়ালিনীর এ কথা বিশ্বাস করিতে পারিলেন না,—গোয়ালিনী কেমন করিয়া নদী পার হইয়া আইসে সেইটুকু নিজে দেখিতে ইচ্ছা করিলেন। ব্রাহ্মণ একদিন গোয়ালিনী কেমন করিয়া নদী পার হয় দেখিবার জন্ত গোয়ালিনীর সহিত চলিলেন। গোয়ালিনী নদীর তীরে আসিয়া একবার ভগবানের নাম উচ্চারণ করিয়া নদীর জলের উপর দিয়া চলিতে আরম্ভ করিল।



কিন্তু তিনি কিছু দূর গিয়াই দেখিলেন, তিনি ক্রমেই

ভুবিয়া যাইতেছেন—

পৃষ্ঠা ১১

পুরোহিত ও গোয়ালিনী

পুরোহিতও তাহার পিছনে পিছনে চলিলেন। কিন্তু তিনি কিছুদূর গিয়াই দেখিলেন, তিনি ক্রমেই ডুবিয়া যাইতেছেন। ব্রাহ্মণের এই অবস্থা দেখিয়া গোয়ালিনী বলিল,—

“ঠাকুর, এ কি ! তুমি ভগবানের নামও করিলে, অথচ পাছে জলে কাপড় ভিজিয়া যায় সেই জন্ত কাপড় সামলাইতেছ। দেখিতেছি, ঠাকুর, তোমার ভগবানের উপর সম্পূর্ণ বিশ্বাস নেই।”

ভগবানের উপর বিশ্বাস না থাকায় ব্রাহ্মণের কি দুর্দশা হইল তাহা তোমরা বুঝিতেই পারিতেছ। ভগবানের উপর যদি সম্পূর্ণ বিশ্বাস থাকে, তাহা হইলে মানুষ অসাধ্য সাধন করিতে পারে।

কাঠুরে ও সন্ন্যাসী ।

এক কাঠুরে বনে কাঠ কাটিত । বাজারে সে কাঠ বেচিয়া সামান্য যাহা কিছু পাইত তাহাতে অতি কষ্টে তাহার দিন কাটিত । একদিন কাঠুরে বনে কাঠ কাটিতেছিল সেই সময় সেইখান দিয়া একজন সন্ন্যাসী যাইতেছিলেন । তিনি কাঠুরেকে কাঠ কাটিতে দেখিয়া বলিলেন,—“ভাই, তুমি এমন বনের ধারে কাঠ কাটিতেছ কেন ? বনের ভিতর প্রবেশ কর, নিশ্চয়ই তোমার অধিক পয়সা হইবে ।”

সন্ন্যাসী চলিয়া গেলেন,—কাঠুরে সন্ন্যাসীর কথার ভাব কিছু বুঝিতে পারিল না । যাহা হউক, পরদিন সে সন্ন্যাসীর কথা মত বনের ভিতর প্রবেশ করিল । বনের ভিতর কিছুদূর গিয়াই সে দেখিল, বনের একটা দিক শুধু চন্দন গাছের বন হইয়া রহিয়াছে । চন্দন গাছের বন দেখিয়া কাঠুরের

কাঠুরে ও সন্ন্যাসী

আনন্দ আর ধরে না। সে যত পারিল সে দিন চন্দন কাঠ কাটিয়া লইয়া বাজারে উপস্থিত হইল। চন্দন কাঠ,—কাজেই অল্প দিন সে কাঠ বেচিয়া যাহা পাইত তাহার চারি গুণ দাম পাইল। কাঠুরের বেশ সুখেই দিন কাটিতে লাগিল। একদিন কাঠ কাটিতে গিয়া কাঠুরের হঠাৎ মনে হইল, সন্ন্যাসী তাহাকে বলিয়াছিলেন, বনের ভিতরে প্রবেশ কর,—কই তিনি তো চন্দন কাঠের কথা কিছু বলেন নাই। দেখি না, আর একটু অগ্রসর হইয়া যদি অল্প কিছু পাই! কাঠুরের এই কথা যেমন মনে হইল অমনি সে চন্দন বন ফেলিয়া আরও একটু বনের ভিতর অগ্রসর হইল। চন্দন বন ফেলিয়া কিছুদূর গিয়াই সে একটা তামার খনি দেখিতে পাইল। এই ভাবে সে যতই বনের ভিতর অগ্রসর হইতে লাগিল,—ততই সে তামার খনির পর সোণার খনি, সোণার খনির পর হীরের খনি দেখিতে পাইল এবং অতি অল্প দিনের মধ্যেই সে একজন মস্ত ধনী হইয়া পড়িল।

রামকৃষ্ণের আরো গল্প

সত্য জ্ঞান লাভ করিতে হইলে কেবল কাঠুরের মত বনের ধারে কাঠ কাটিলে চলিবে না, বনের ভিতর অগ্রসর হইতে হইবে,—যতই তোমরা বনের ভিতর অগ্রসর হইবে, ততই নূতন নূতন জ্ঞান লাভ করিতে পারিবে। সন্ন্যাসী তাই কাঠুরেকে বলিয়াছিলেন, অগ্রসর হও। আমরাও বলি, অগ্রসর হও। যতই অগ্রসর হইবে ততই নূতন জ্ঞান লাভ করিতে পারিবে।

ব্যাসদেবের নদী পার ।

একদিন ব্যাসদেব যমুনা পার হইতে যাইতে ছিলেন, সেই সময় গোপীরা আসিয়া সেইখানে উপস্থিত হইল । তাহাদেরও যমুনা পার হইতে হইবে । বর্ষাকাল—যমুনা তখন কানায় কানায় ভরিয়া উঠিয়াছে । খেয়া নৌকাও নাই । গোপীরা ভাবিয়া আকুল কেমন করিয়া নদী পার হইবে । নদীর কূলে ব্যাসদেবকে দেখিয়া গোপীরা বলিল,—“ঠাকুর, আমাদের নদী পার হইতে হইবে, খেয়া নৌকা একখানিও নাই,—আমরা কেমন করিয়া নদী পার হইব ?

গোপীদের কথা শুনিয়া ব্যাসদেব বলিলেন,—

“সে জন্ত তোমাদের ভাবিতে হইবে না, আমি তাহার ব্যবস্থা করিয়া দিব । কিন্তু আমি বড় ক্ষুধার্ত্ত, তোমরা আমাকে কিছু খাইতে দাও ।”

গোপীদিগের সহিত দুধ, ননী, মাখন ছিল,

রামকৃষ্ণের আরো গল্প

তাহারা ব্যাসদেবকে তখনই তাহা খাইতে দিল।
ব্যাসদেব পরম তৃপ্তির সহিত সেই সকল আহার
করিলেন। আহার শেষ হইলে গোপীরা বলিল,—
“ঠাকুর এইবার আমাদের পারের ব্যবস্থা করুন।”

ব্যাসদেব যমুনার কুলে দাঁড়াইয়া বলিলেন,—
“হে যমুনে ! আজ যদি আমি কিছু আহার না করিয়া
থাকি, তবে আমাদের একটু পথ দাও।”

ব্যাসদেবের কথা শেষ হইতে না হইতে অমনি
যমুনা দুই দিকে সরিয়া গেল ও মাঝখানে পথ
বাহির হইয়া পড়িল। এই ব্যাপারে গোপীরা
একেবারে অবাক হইয়া গেল। তাহারা মনে মনে
ভাবিল, এ কি রকম হইল ! এই মাত্র ব্যাসদেব
আহার করিলেন,—অথচ তিনি যেমন বলিলেন,
আমি যদি কিছু আহার করিয়া না থাকি তবে যমুনা
পথ দাও, অমনি যমুনা পথ দিল, ইহার কারণ
কি ?

ইহার কারণ যে কি, গোপীরা তাহা কেমন
করিয়া বুঝিবে ? ব্যাসদেবের দৃঢ় বিশ্বাস ছিল

ব্যাসদেবের নদী পার

তিনি কেহই নন, তাহার ভিতরে যে ভগবান
রহিয়াছেন তিনিই সব। কাজেই তিনি
আহার করেন নাই, ভগবানই আহার করিয়া-
ছিলেন। তাই তাঁহার কথায় যমুনা পথ দিয়াছিল।
ভগবানের উপর যে এরূপ বিশ্বাস করিতে পারে
তাহার নিজের বলিয়া আর কিছুই থাকে না।

জটিল ও দীনবন্ধু দাদা ।

একদেশে এক বালক ছিল, তাহার নাম জটিল ।
জটিল বড় দুঃখী । পৃথিবীতে মা ভিন্ন জটিলের
আর কেহ ছিল না । জটিল রোজ একাকী বনের
ভিতর দিয়া পাঠশালায় যাইত । বনের ভিতর
দিয়া একাকী যাইতে তাহার বড় ভয় হয় । এক
দিন সে তাহার মাকে বলিল,—“মা, বনের ভিতর
দিয়া পাঠশালায় যাইতে আমার বড় ভয় করে ।”

জটিলের কথায় জটিলের মার চোখে জল
আসিল, তিনি বলিলেন,—“বাবা, ভয় কি ?
যখনই তোমার ভয় হইবে তখনই দীনবন্ধু দাদা
বলিয়া ডাকিও, তাহা হইলে আর তোমার কোন
ভয় থাকিবে না ।”

জটিল জিজ্ঞাসা করিল,—“হ্যাঁ মা, দীনবন্ধু
দাদা কে ?”

জটিলের মা বলিলেন,—“তোমার বড় দাদা ।”



গগবান্ বালকের মূৰ্ত্তি ধরিয়া জটিলকে দেখা দিলেন ।

পৃষ্ঠা ১১

জটিল ও দীনবন্ধু দাদা

সেই দিন হইতে পাঠশালায় যাইবার সময় যখনই জটিলের ভয় হইত তখনই সে চীৎকার করিয়া ডাকিত দীনবন্ধু দাদা, দীনবন্ধু দাদা, আমার বড় ভয় করিতেছে—কই এস, আমাকে দেখা দাও।”

সরল বিশ্বাসী বালকের ডাকে কি আর ভগবান্ স্থির থাকিতে পারেন? ভগবান্ বালকের মূর্ত্তি ধরিয়া জটিলকে দেখা দিলেন। তিনি জটিলের সম্মুখে আসিয়া বলিলেন,—“এই যে ভাই, আমি আসিয়াছি। আর তো ভাই তোমার ভয় করিবার কিছু নাই। চল আমি তোমাকে তোমার পাঠশালায় রাখিয়া আসি।”

পাঠশালার নিকটে আসিয়া ভগবান্ বলিলেন,—“ভাই যখনই তুমি আমাকে ডাকিবে, তখনই আমি আসিয়া উপস্থিত হইব। তবে আর ভাই তোমার ভয় কি?”

সরল বিশ্বাসের এমনই শক্তি যে সে ভগবানকেও টানিয়া আনিতে পারে।

ভণ্ড সেকরা ।

এক গ্রামে এক সেকরা ছিল, তাহার মত ভক্ত বড় দেখিতে পাওয়া যায় না। সেকরা গোড়া বৈষ্ণবের মত সর্ব্বাঙ্গে ভগবানের নাম তিলক কাটিয়া দোকানের ভিতর বসিয়া থাকিত এবং দিন রাত কেবল ভগবানের নাম করিত। সেকরার চাল-চলন দেখিয়া গ্রামের সকলেই সেকরাকে বড় ভাল মানুষ বলিয়া জানিত, এবং সকলেই তাহাকে বিশ্বাস করিত। যখনই যাহার যাহা কিছু গহনা গড়াইবার দরকার হইত তখনই সে ওই সেকরার দোকানেই যাইত। কারণ সকলেই ভাবিত অমন লোকের দ্বারা জুয়াচুরী বাটপারী হইতে পারে না। যখনই সেকরার দোকানে খরিদারগণ আসিত তখনই সেকরা ভিতর হইতে বলিয়া উঠিত,—

“কেশব, কেশব।”

সঙ্গে সঙ্গে একজন কারিকর অমনি বলিত,
—“গোপাল—গোপাল।”

তাহার সুরে সুর দিয়া অপর একজন কারিকর
অমনি বলিত,—“হরি—হরি।”

সেকরা ভিতর হইতে তখনি আবার বলিত,—
“হর—হর।”

দোকানে না উঠিতেই এইরূপ ভগবানের নাম
শুনিয়া খরিদারগণের মনে একেবারে দৃঢ় বিশ্বাস
হইত,—“আহা, সেকরার মত ভাল লোক আর
দ্বিতীয় নাই।”

কিন্তু আসল কথা, সেকরাটি ছিল ভণ্ড।
সেকরা ভিতর হইতে বলিত কেশব অর্থাৎ এরা
সব কে ? কারিকর উত্তর দিত, গোপাল অর্থাৎ
এদের মুখ দেখিয়া বুঝিয়াছি ইহারা গরুপাল।”
তখনি আবার একজন বলিত, “হরি হরি।” অর্থাৎ
তাহ’লে চুরি করা যাক্। সেকরা অমনি ভিতর
হইতে বলিত, হর হর অর্থাৎ হ্যাঁ, নিরেট
চুরি কর।

রামকৃষ্ণের আরো গল্প

শুধু তিলক মালা পরিলেই যে সে সাধু হইবে
তাহার কোন মানে নাই। যাহার প্রাণে ভক্তি
আছে, ভগবানে বিশ্বাস আছে, সেই যথার্থ সাধু।

দুই ভাই

এক গ্রামে দুই ভাই বাস করিত। কিছুদিন বাদে বড় ভাই সন্ন্যাসী হইয়া বাহির হইয়া গেল। বড় ভাই সন্ন্যাসী হইয়া নানাতীর্থ ঘুরিয়া বার বৎসর বাদে একবার জন্মভূমি দেখিতে আসিল। বার বৎসর বাদে বড় ভাই বাড়ী আসিয়াছে, ছোট ভাইয়ের আর আনন্দ ধরে না। নানা কথার পর ছোট ভাই জিজ্ঞাসা করিল,—“আচ্ছা দাদা, ঘর সংসার ছাড়িয়া এই বার বৎসর তুমি সন্ন্যাসী হইয়া ঘুরিয়া বেড়াইলে, ইহাতে তুমি লাভ করিলে কি?”

বড় ভাই মৃদু হাসিয়া বলিলেন, “আমি কি লাভ করিয়াছি?—আমার সহিত এস এখনি তাহা দেখিতে পাইবে।”

এই কথা বলিয়া বড় ভাই ছোট ভাইকে সঙ্গে লইয়া নদীর কূলে আসিয়া উপস্থিত হইলেন এবং হাটিয়া নদী পার হইয়া চলিয়া গেলেন। সেটা

রামকৃষ্ণের আরো গল্প

খেয়া ঘাট, খেয়া নৌকা ক্রমাগতই এপার ওপার করিতেছিল। ছোট ভাই একটি পয়সা দিয়া খেয়া নৌকায় বড় ভাইয়ের পিছনে পিছনেই পরপারে যাইয়া উপস্থিত হইল, তাহার পর বড় ভাইয়ের দিকে চাহিয়া বলিল,—“দাদা, এই বার বৎসর এত কষ্ট করে এত পরিশ্রম করে তুমি শেষ এই ক্ষমতা লাভ করিলে যাহার দাম একটী পয়সা মাত্র।”

বড় ভাই ছোট ভাইয়ের এ কথার কোন উত্তর দিতে পারিলেন না। সত্যই ত, তিনি যে ক্ষমতা লাভ করিয়াছেন তাহার মূল্য কেবল মাত্র একটী পয়সা। সামান্য একটু ক্ষমতা লাভ করিবার জন্ত যাহারা সন্ন্যাসী হয় তাহাদের কেবল কষ্ট ও পরিশ্রমই সার হয়। আর যাহারা কেবল ভগবানকে পাইবার আশায় সন্ন্যাস গ্রহণ করে তাহাদেরই সন্ন্যাস সার্থক হয়।

সাধু ও ভগবান ।

একদেশে এক পরম ধার্মিক সাধু ছিলেন ।
কঠিন যোগ সাধনা করিয়া তিনি অদ্ভুত ক্ষমতা লাভ
করিয়াছিলেন । সাধু অন্য সব বিষয়েই সাধুর
মতনই ছিলেন কিন্তু এই অদ্ভুত ক্ষমতা লাভ করিয়া
তাহার মনে মনে বেশ একটু অহঙ্কার হইয়াছিল ।
ভগবান এই সাধুকে কিছু শিক্ষা দিবার জন্য এক
দিন ব্রাহ্মণের বেশে সেই সাধুর নিকট আসিয়া
উপস্থিত হইলেন । সাধু ব্রাহ্মণকে দেখিয়া বসিবার
জন্ম আসন দিলেন, এবং তাঁহার নিকট তিনি কি
জন্ম আসিয়াছেন জিজ্ঞাসা করিলেন ।

সেই সময় সেইখান দিয়া একটা হাতী
যাইতেছিল । ভগবান বলিলেন,—“হে মহাপুরুষ !
শুনিলাম, যোগ সাধনার দ্বারা অদ্ভুত ক্ষমতা লাভ
করিয়াছেন । আচ্ছা মহাপুরুষ, আপনি যদি ইচ্ছা

রামকৃষ্ণের আরো গল্প

করেন তাহা হইলে কি এই হাতীটাকে এখনি মারিয়া ফেলিতে পারেন ?”

সাধু বেশ একটু অহঙ্কারের সহিত বলিলেন,—
“নিশ্চয়ই। ইহা এমন কিছু কঠিন নহে।”

কথাটা শেষ করিয়া সেই সাধু এক মুঠা ধূলা লইয়া বিড় বিড় করিয়া কয়েকটা মন্ত্র বলিয়া হাতীর দিকে ছুড়িয়া দিলেন। সঙ্গে সঙ্গে হাতীটা সেইখানেই পড়িয়া মরিয়া গেল। ভগবান বলিলেন,—“আপনি যথার্থই সাধু। কি অদ্ভুত ক্ষমতা আপনার! এত বড় একটা হাতীকে অনায়াসে মারিয়া ফেলিলেন, আচ্ছা আপনি ইচ্ছা করিলে এই হাতীটাকে বাঁচাইয়াও নিশ্চয়ই দিতে পারেন।”

সাধু অহঙ্কারে ফুলিতে ফুলিতে বলিলেন,
“নিশ্চয়ই।”

আবার একমুঠা ধূলা লইয়া মন্ত্র পড়িয়া যেমন হাতীর দিকে ছুড়িয়া দিলেন, অমনি হাতীটা আবার খড়মড়িয়া উঠিয়া দাঁড়াইল ও যেদিকে যাইতেছিল

সেই দিকে চলিয়া গেল। ভগবান বলিলেন,—
 “আপনি যথার্থই ক্ষমতাবান পুরুষ। কিন্তু আমার
 একটি প্রশ্ন আছে। এই হাতীটাকে মারিয়া ফেলিয়া
 এবং আবার এই হাতীটাকে বাঁচাইয়া দিয়া
 আপনার লাভ হইল কি? ইহার দ্বারা কি আপনি
 ভগবান লাভ করিতে পারিবেন?”

ভগবানের এই কথায় সাধুর চোখ ফুটিল।
 তিনি বুঝিলেন, এই সকল ক্ষমতা কিছুই নহে।
 সেই হইতে তিনি সমস্ত অহঙ্কার ভুলিয়া ভগবান
 লাভ করিবার জন্য আবার নূতন সাধনা আরম্ভ
 করিলেন। সামান্য একটু শক্তি লাভ করিয়া যাহারা
 সর্বশক্তিমান ভগবানকে ভুলিয়া যায় তাহারাই
 পৃথিবীতে সর্বাপেক্ষা নির্বেদ। সামান্য একটু
 অহঙ্কার থাকিলে আর ভগবানকে পাওয়া যায় না।

আকবর ও ফকির ।

আকবর বাদসাহের রাজত্বে এক ফকির দিল্লীর নিকটে—এক বনে—বাস করিতেন। ফকিরের নিকট জ্ঞান লাভ করিবার জন্য দলে দলে লোক দেশ বিদেশ হইতে আসিত। কিন্তু দীন হীন ফকিরের এমন সম্বল ছিল না যে, তিনি তাঁহার কুটীরে তাহাদের রাখিয়া শিক্ষা দান করিতে পারেন। এইজন্য ফকিরের মনে মনে বড় আপশোষ হইত। অনেক চিন্তার পর ফকির স্থির করিলেন তিনি বাদসার নিকট কিছু সাহায্য ভিক্ষা করিবেন। মনে মনে এইরূপ স্থির করিয়া একদিন ফকির আকবর বাদসার নিকট গিয়া উপস্থিত হইলেন। বাদসা তখন নমাজ পড়িতেছিলেন, ফকির তাঁহার পিছনে গিয়া বসিলেন। বাদসা ভগবানের নিকট প্রার্থনা করিতেছিলেন,—“হে ভগবান, তুমি আমায়



বাদশা তখন নমাজ পড়িতেছিলেন, ফকির তাঁহার
পিছনে গিয়া বসিলেন।

পৃষ্ঠা ২৮

আকবর ও ফকির

আরও ধন, আরও শক্তি, আরও রাজত্ব প্রদান কর।”

ফকির আকবরের পিছনেই বসিয়াছিলেন,—
আকবরের এই প্রার্থনার কথাগুলি সমস্তই তিনি
স্পর্শই শুনিতে পাইলেন। ফকির আর একটীও
কথা না বলিয়া ধীরে ধীরে উঠিয়া দাঁড়াইলেন ও
সেই মসজিদ হইতে বাহির হইয়া যাইতেছিলেন।
আকবর ফকিরকে উঠিয়া যাইতে দেখিয়া ইজিতে
আবার তাহাকে বসিতে বলিলেন। বাদসার
আদেশ ফকির অমান্য করিতে পারিলেন না,
তাহাকে আবার বসিতে হইল।

নমাজ শেষ হইবার পর আকবর ফকিরকে
জিজ্ঞাসা করিলেন,—“ফকির, তুমি আমার সহিত
দেখা করিতে আসিয়াছিলে, কিন্তু আমাকে একটা
কথাও না বলিয়া চলিয়া যাইতেছিলে কেন?”

উত্তরে ফকির বলিলেন,—“বাদসা, আমি
যেজ্ঞ আপনার নিকট আসিয়াছিলাম সেজ্ঞ আর
আপনাকে বিরক্ত করিতে চাহি না।”

রামকৃষ্ণের আরো গল্প

আক্‌বর কিন্তু ফকিরকে ছাড়িলেন না, তাহার আসিবার কারণটুকু জানিবার জন্য ফকিরকে নানা ভাবে জেদাজেদী করিতে লাগিলেন। আক্‌বরের জেদাজেদীতে বাধ্য হইয়া শেষে ফকির বলিলেন,—“বাদসা, রোজই দলে দলে লোক আমার নিকটে গিয়া কিছু শিক্ষা লাভ করিতে চায়, কিন্তু আমার এমন সম্বল নাই, যাহাতে তাহাদের আমার কুটীরে রাখিয়া শিক্ষা দিতে পারি, তাই আমি আপনার নিকট কিছু সাহায্য প্রার্থনা করিতে আসিয়াছিলাম।”

ফকিরের এই কথা শুনিয়া আক্‌বর বলিলেন,—“ফকির, তবে তুমি আমাকে এ কথা না বলিয়া চলিয়া যাইতেছিলে কেন?”

ফকির বলিলেন, “বাদসা, যখন আমি দেখিলাম আপনিও একজন ভিখারী, ভগবানের নিকট ধন, শক্তি, রাজত্ব ভিক্ষা করিতেছেন, তখন আমি মনে মনে ভাবিলাম ভিখারীর নিকট আর ভিক্ষা করিয়া লাভ কি? যদি ভিক্ষা করাই আমার

দরকার হয় তাহা হইলে ভগবানের নিকটেই ভিক্ষা করিব।”

ফকিরের কথায় আকবর আর কোন কথা কহিতে পারিলেন না। ফকির নিজের কুটীরে ফিরিয়া গেলেন। আকবর বাদসার সহিত সাক্ষাৎ করিতে আসিয়া তাঁহার এইটুকু শিক্ষা হইল, মানুষ মানুষকে ভিক্ষা দিতে পারে না। মানুষ মাত্রেই কাঙ্গাল—কাঙ্গাল কি কাঙ্গালকে ভিক্ষা দিতে পারে? সকল ঐশ্বর্যের মালিক যিনি, যাহার অনন্ত শক্তি, সেই ভগবান ভিন্ন কি কেহ কাহাকেও কিছু দিতে পারে? যদি ভিক্ষাই চাহিতে হয় তবে তাহারই নিকট চাওয়া উচিত।

তামাক খাওয়া

এক দেশে এক তামাক খেকো বুড়ো ছিল।
এক দণ্ড বুড়োর তামাক না হইলে চলিত না। এক
দিন রাত্রি দুপুরের সময় সেই বুড়োর ঘুম ভাঙ্গিয়া
গেল এবং তাহার তামাক খাইবার বড় ইচ্ছা হইল।
বুড়ো তাড়াতাড়ি বিছানা ছাড়িয়া উঠিয়া কলিকা
লইয়া তামাক সাজিল কিন্তু চারিদিক খুঁজিয়া
দেখিল আগুন নাই, কাজেই সে প্রতিবাসীর বাড়ী
হইতে আগুন আনিতে চলিল। রাত্রি দুপুরে
পাড়ার সকলেই ঘুমাইতেছিল, বুড়ো অনেক
ডাকাডাকি হাকাহাকি করিয়া একজনকে তুলিল।
এত রাত্রে কে ডাকে দেখিবার জন্য সেই লোকটা
ব্যস্ত সমস্ত হইয়া দরজা খুলিয়া দিল এবং বুড়োকে
দেখিয়া জিজ্ঞাসা করিল,—“এত রাত্রে !
ব্যাপার কি ?”

তামাক খাওয়া

বুড়ো বলিল,—“আমি একটু তামাক খাইব,
তাই আগুন চাহিতে আসিয়াছি।”

লোকটা তো বুড়োর কথা শুনিয়া একেবারে
অবাক। হাসিতে হাসিতে বলিল,—“এত রাত্রে
আমার বাড়ীতে আগুন চাহিতে আসিয়াছেন,
আপনার হাতেই যে লণ্ঠন জ্বলিতেছে।”

বুড়োর তখন মনে হইল, তাই ত! আমার
হাতেই ত লণ্ঠন জ্বলিতেছে। বুড়ো আর
কোন কথা কহিল না! যেমন গিয়াছিল তেমনি
ফিরিয়া আসিল।

মানুষ যাহা চায় তাহা তাহার ভিতরেই আছে।
কিন্তু তবুও তাহারা মায়ায় এমনি অন্ধ যে তাহার
জগুই চারিদিকে হাতড়াইয়া মরে।

তাঁতীর বিপদ

এক গ্রামে এক তাঁতি বাস করিত। তাঁতি পরম ভক্ত, ভগবান ভিন্ন সে আর কিছুই জানিত না। গ্রামের সকলেই তাঁতিকে বড় ভাল বাসিত ও বিশ্বাস করিত। তাতি যখন বাজারে কাপড় বিক্রয় করিতে যাইত, তখন কোন খরিদদার কাপড়ের দাম কত জিজ্ঞাসা করিলে সে বলিত,—“ভগবানের ইচ্ছায় এই কাপড় খানায় সূতা পড়িয়াছে এক টাকার,—ভগবানের ইচ্ছায় কাপড়-খানি তৈয়ারী করিতে পারিশ্রমিক লাগিয়াছে চারি আনা, ভগবানের ইচ্ছায় লাভ দুই আনা। কাজেই ভগবানের ইচ্ছায় এই কাপড়খানির দাম হইতেছে এক টাকা ছয় আনা।”

লোকের এই তাঁতির উপর এমনি অগাধ বিশ্বাস ছিল, যে তাহারা আর কোন কথা না বলিয়া দাম ফেলিয়া দিয়া কাপড় লইয়া চলিয়া যাইত।

তাঁতীর বিপদ

রাত্রে আহারের পর প্রতিদিন তাঁতি অনেক রাত্রি পর্যন্ত ঘরের দাওয়ায় বসিয়া ভগবানের নাম করিত, তাহার পর শুইতে যাইত। একদিন রাত্রে সে তাহার ঘরের দাওয়ায় বসিয়া ভগবানের নাম করিতেছে, এই সময় একজন ডাকাত সেই রাস্তা দিয়া যাইতেছিল। ডাকাতেরা তাহাদের ডাকাতীর মালপত্র বহিবার জন্য একটা মুটে খুঁজিতেছিল, তাহারা তাঁতিকে দাওয়ার উপর বসিয়া থাকিতে দেখিয়া মোট বহাইবার জন্য তাহাকে জোর করিয়া তাহাদের সহিত টানিয়া লইয়া চলিল। ডাকাতেরা তাহার পর এক বাটীতে ডাকাতী করিয়া ডাকাতীর জিনিস পত্র তাঁতির মথায় তুলিয়া দিল। সেই সময় চৌকিদার আসিয়া পড়াতে ডাকাতেরা যে যদিকে পারিল পলাইল, কেবল তাঁতি পলাইতে পারিল না, সে মাল শুদ্ধ ধরা পড়িয়া গেল। সে রাত্রি তাহার হাজতে থাকিতে হইল। পরদিন চৌকিদার তাহাকে হাকিমের নিকট হাজির করিল। এই ঘটনার কথা সকাল হইতে না হইতেই সমস্ত গ্রামময়

রামকৃষ্ণের আরো গল্প

ছড়াইয়া পড়িল। গ্রামের লোক তাঁতিকে দেখিবার জন্য দলে দলে ছুটিয়া আসিল। তাহারা সকলেই এক বাক্যে হাকিমের নিকট বলিল,—“এই লোকের দ্বারা চুরি অসম্ভব।”

হাকিম তাঁতিকে সত্য কথা বলিতে বলিলেন, তাঁতি বলিল,—“হুজুর, ভগবানের ইচ্ছায় কাল রাত্রে আমি আমার ঘরের দাওয়ায় বসিয়া ভগবানের নাম করিতে ছিলাম, সেই সময় ভগবানের ইচ্ছায় সেই রাস্তা দিয়া একদল ডাকাত যাইতেছিল। ভগবানের ইচ্ছায় তাহারা আমাকে জোর করিয়া টানিয়া তাহাদের সঙ্গে লইয়া চলিল। ভগবানের ইচ্ছায় তাহার পর তাহারা এক বাটীতে ডাকাতি করিল। ভগবানের ইচ্ছায় ডাকাতীর মালপত্র বাঁধিয়া আমার মাথায় তুলিয়া দিল, তাহার পর ভগবানের ইচ্ছায় চৌকিদার আসিয়া পড়িল, ভগবানের ইচ্ছায় ডাকাতেয়া পলাইল, আমি ধরা পড়িলাম।”

তাঁতির কথায় হাকিম বুঝিলেন, লোকটা সত্যই

তাঁতীর বিপদ

নির্দোষী ও সরল বিশ্বাসী। তিনি তাঁতিকে ছাড়িয়া দিতে হুকুম দিলেন। তাঁতি খালাস পাইয়া তাহার বন্ধুবর্গকে বলিতে লাগিল যে, “ভগবানের ইচ্ছায় আমি আবার খালাস পাইয়াছি।”

ভগবানের উপর সমস্ত ভার অর্পণ করিয়া যে কেবল তাহার কর্তব্যটুকু প্রতিপালন করে সেই যথার্থ সাধু।

সন্ন্যাসী ও জমিদার ।

এক গ্রামে সন্ন্যাসীদের একটা মঠ ছিল । সন্ন্যাসীরা প্রতিদিন প্রাতে ভিক্ষা করিতে বাহির হইতেন । একদিন এক সন্ন্যাসী রাস্তা দিয়া যাইতে যাইতে দেখিলেন, গ্রামের জমিদার একটা দরিদ্র লোককে নিদারুণ ভাবে প্রহার করিতেছেন । এই ব্যাপার দেখিয়া সন্ন্যাসীর প্রাণ গলিয়া গেল ; তিনি জমিদারের নিকট গিয়া মিনতি পূর্ণ স্বরে বলিলেন,—“এ লোকটাকে আর মারিবেন না ।”

সন্ন্যাসীর কথায় জমিদারের রাগটা গিয়া পড়িল সন্ন্যাসীর উপর । জমিদার সেই লোকটাকে ছাড়িয়া সন্ন্যাসীকে প্রহার করিতে আরম্ভ করিলেন এবং এমন মার মারিলেন যে তাঁহাকে সেইখানে অজ্ঞান হইয়া পড়িতে হইল । মঠের সন্ন্যাসীরা এই সংবাদ পাইয়া সেই সন্ন্যাসীকে ধরাধরি করিয়া মঠে লইয়া আসিলেন, এবং তাঁহার মুখে চোখে জলের

সন্ন্যাসী ও জমিদার

ঝাপটা দিয়া তাঁহার জ্ঞান ফিরাইয়া আনিবার চেষ্টা করিতে লাগিলেন। বহু কষ্টে যখন তাহার জ্ঞান হইল, সন্ন্যাসী যখন চোখ মেলিয়া চাহিলেন, তখন অপরাপর সন্ন্যাসীরা জিজ্ঞাসা করিলেন,—“বন্ধু, এখন তোমায় যাহারা শুশ্রূষা করিতেছেন তাঁহাদের চিনিতে পারিতেছ ?”

সেই সন্ন্যাসী মৃদু স্বরে বলিলেন,—“আমায় যিনি একটু পূর্বের প্রহার করিয়াছেন তিনিই আমায় এক্ষণে শুশ্রূষা করিতেছেন।”

যথার্থ যিনি সাধু তাঁহার শত্রু মিত্র ভেদ থাকে না। তিনি সকল আত্মার ভিতরেই ভগবানকে দেখিয়া থাকেন।

জেলের মাছ চুরি

এক দেশে এক জেলে ছিল, সে রাত্রে পরের পুকুরে মাছ চুরি করিয়া বেড়াইত। একদিন ঘুরঘুটে অন্ধকার রাত্রে সে মাছ চুরি করিবার জন্য এক জনের বাগানে প্রবেশ করিল। বাগানের মাঝখানে পুকুর, জেলে নিঃশব্দে পুকুরের নিকটে গিয়া ঝপাৎ করিয়া পুকুরে জাল ফেলিয়া দিল। পুকুরের মালিক যিনি তিনি সজাগ হইয়া পুকুর পাহারা দিতেছিলেন,—জালের শব্দ শুনিবা মাত্র তিনি আলো দিয়া চোর ধরিতে তখনি দুইজন লোক পাঠাইয়া দিলেন। আলো লইয়া দুইজন লোক পুকুরের দিকে আসিতেছে দেখিয়া জেলে তাড়াতাড়ি জালখানা পুকুরের ভিতর ফেলিয়া দিয়া, সাধুর মতন মুখে কতকটা ছাই মাখিয়া, একটা গাছের তলায় বসিয়া পড়িল। যাহারা চোর ধরিতে আসিয়াছিল তাহারা কোথায় কাহাকেও

দেখিতে পাইল না, কেবল একজন সাধুকে গাছের তলায় বসিয়া থাকিতে দেখিল। পুকুরের মালিককে আসিয়া তাহারা তাহাই বলিল। পুকুরের মালিক, তাহার বাগানে সাধু আসিয়াছেন শুনিয়া, তাড়াতাড়ি ছুটিয়া আসিয়া সাধুকে প্রণাম করিলেন এবং প্রচুর সামগ্রী পাঠাইয়া দিলেন। জেলে পালাই পালাই করিয়াও পালাইবার সুবিধা করিয়া উঠিতে পারিল না, এ দিকে ভোর হইয়া গেল। সকাল হইবার সঙ্গে সঙ্গে দলে দলে লোক সাধু দেখিতে আসিতে লাগিল ও যে যাহা পারিল সে তাহা দিয়া সাধুর সেবা করিতে লাগিল। জেলে মনে মনে ভাবিল, আমি সাধু নই, কেবল সাধুর মত হইয়া বসিয়াছি বলিয়া আজ লোকে আমায় কত সম্মান করিতেছে। যদি আমি যথার্থ সাধু হই তাহা হইলে লোকে আমায় না জানি আরও কত ভক্তি করিবে, সম্মান করিবে, এমন কি হয়তো আমি ভগবানকেও পাইতে পারিব।

রামকৃষ্ণের আরো গল্প

এই কথা মনে হইবার সঙ্গে সঙ্গে জেলের মনের ময়লা দূর হইয়া গেল। সে সেই দিন বুঝিতে পারিল পৃথিবী মিথ্যা—একমাত্র ভগবানই সত্য। এবং সেই চেষ্টায় সব ছাড়িয়া বাহির হইয়া পড়িল। সাধু সাজিবারও এমন মজা যে তাহাতেও মনের ময়লা দূর হইয়া যায়।

চাষার ছেলে

এক চাষার একটা বড় সুন্দর ছেলে হইয়াছিল। চাষা তাহার সেই ছেলেটাকে প্রাণের চেয়ে বেশী ভাল বাসিত। হঠাৎ একদিন সেই ছেলেটা ভেদ বমি হইয়া মরিয়া গেল। ছেলেটা মরিয়া যাওয়ায় বাড়ী শুদ্ধ সকলে হাহাকার করিয়া কাঁদিতে লাগিল। কিন্তু চাষা সে জন্ত একেবারেই কাতর হইল না, সে বাড়ীর অপর অপর লোক দিগকে নানা ভাবে বুঝাইয়া সান্ত্বনা দিতে লাগিল।

চাষার ছেলে

চাষার এই ভাব দেখিয়া চাষার স্ত্রীর মনে মনে স্বামীর উপর বড় রাগ হইল। সে দুঃখ করিয়া চাষাকে বলিল,—“এমন একটা ছেলে মরিয়া গেল, তুমি কি পাষণ! তাহার জন্ম এক কোঁটা চোখের জলও ফেলিলে না। বাড়ী শুদ্ধ সকলে কাঁদিতেছে, আর তুমি তো বেশ শান্ত রহিয়াছ।”

চাষা শান্ত স্বরে বলিল,—“দেখ, কাল রাত্রে আমি স্বপ্ন দেখিয়াছি যে আমি রাজা হইয়াছি, আমার আটটা ছেলে, তাহাদের লইয়া আমি বড়ই সুখে রাজত্ব করিতেছি, তাই বুঝিতে পারিতেছি না, যে এই আট ছেলের জন্ম কাঁদিব, না আমাদের হরির জন্ম কাঁদিব?” এই চাষা যথার্থই জ্ঞানী পুরুষ। সে বুঝিয়াছিল যে আমরা জাগরণ অবস্থায় যাহা করি বা যাহা দেখি তাহাও ঠিক স্বপ্নের মত মিথ্যা। ভগবান ব্যতীত পৃথিবীতে সত্য জিনিস কিছুই নাই। কাজেই জ্ঞানী পুরুষেরা শোক দুঃখে একেবারেই বিচলিত হন না।

পুরোহিতের ছেলে

এক গ্রামে এক ঠাকুর মন্দির ছিল। এই মন্দিরের যিনি পুরোহিত ছিলেন অর্থাৎ যিনি প্রত্যহ ঠাকুরের পূজা করিতেন, তাঁহার একদিন হঠাৎ অন্য গ্রামে যাইবার বিশেষ দরকার পড়িল। এক দিন রাত্রে তিনি আর ফিরিতে পারিবেন না দেখিয়া ছেলেকে ডাকিয়া বলিয়া গেলেন, “আজ রাত্রে তুমি ঠাকুরের শীতলটা দিয়া আসিস, আজ রাত্রে হয় তো আমি আর ফিরিতে পারিব না।”

পুরোহিত ছেলের উপর পূজার ভার দিয়া চলিয়া গেলেন। পুরোহিতের ছেলে সন্ধ্যার পর ঠাকুরের শীতল দিতে মন্দিরে গিয়া উপস্থিত হইল। পুরোহিতের ছেলে কখনও ঠাকুরের পূজা করে নাই, কেমন করিয়া পূজা করিতে হয় তাহাও সে জানে না। মন্দিরে গিয়ে ঠাকুরের নৈবেদ্য দেখিয়া সে ভাবিল, ঠাকুর প্রতিমার ভিতর হইতে বাহির

পুরোহিতের ছেলে

হইয়া নিশ্চয়ই রোজ এই সকল সামগ্রী আহার করেন। তাই সে বহুক্ষণ চক্ষু বুজিয়া ঠাকুরের সম্মুখে বসিয়া রহিল, কিন্তু ঠাকুরকে তবুও আসিতে না দেখিয়া সে হাত দুইটা জোড় করিয়া বলিল, “ঠাকুর, শীঘ্র আসিয়া আহার কর। রাত বড় বেশী হইতেছে, আমি ছেলে মানুষ, আর কতক্ষণ বসিয়া থাকিব?”

কিন্তু ঠাকুর কোন কথা কহিলেন না। ঠাকুরকে না আসিতে দেখিয়া পুরোহিতের ছেলের কেমন ভয় হইল, সে কাঁদিয়া ফেলিল। সে কাঁদিতে কাঁদিতে বলিল, “ঠাকুর, বাবা আমায় তোমার পূজা করিতে বলিয়া গিয়াছেন, আমি মন্ত্র তন্ত্র কিছুই জানি না, তাই কি ঠাকুর তুমি আসিতেছ না? ঠাকুর শীঘ্র এস, তুমি না আসিলে বাবা কাল আমাকে বড় বকিবেন।”

পুরোহিতের ছেলে আর কিছু বলিতে পারিল না, কেবলই ফুঁপাইয়া ফুঁপাইয়া কাঁদিতে লাগিল। হঠাৎ সে ঠাকুরের দিকে চাহিয়া দেখিল, ঠাকুর

রামকৃষ্ণের আরো গল্প

সম্মুখে বসিয়া আহার করিতেছেন। ঠাকুরের আহার শেষ হইলে পুরোহিতের ছেলে যখন মন্দির হইতে বাহির হইয়া আসিল তখন সকলে জিজ্ঞাসা করিতে লাগিল, “নৈবেদ্য সকল কোথায় রাখিয়া আসিলে?”

পুরোহিতের ছেলে বলিল, “নৈবেদ্য! সে ত সব ঠাকুর খাইয়াছেন।”

ঠাকুর খাইয়াছেন! পুরোহিতের ছেলের কথায় সকলে অবাক হইয়া গেল। তাহার পর মন্দিরের ভিতর প্রবেশ করিয়া নৈবেদ্যের শূণ্য পাত্র সকল দেখিয়া তাহাদের আর আশ্চর্য্যের সীমা পরিসীমা রহিল না। সরল বিশ্বাসের এমনি শক্তি যে তাহাতে পাষাণের ঠাকুরও সজীব হইয়া আহার করেন।

শ্রীশিশির কুমার মিত্র, বি. এ. কর্তৃক শিশির পাব্‌লিশিং হাউস হইতে
প্রকাশিত এবং কলিকাতা—৩৩নং গৌরীবেড় লেন ‘সূর্য-প্রেসে’
শ্রীমুখোবচন্দ্র সরকার দ্বারা মুদ্রিত।



সে হাত দুটি জোড় করিয়া বলিল, ঠাকুর, শীঘ্র আসিয়া

আহার কর ।

পৃষ্ঠা ৪৬

শিশির পাবলিশিং হাউসের শিশুতোষ সিরিজ



নৈতিক, পারমার্থিক ও জাতীয় শিক্ষার পক্ষে অপরিহার্য—

প্রতি মাসে একখানি করিয়া প্রকাশিত হয়

আশ্বিন হইতে বর্ষ আরম্ভ

সডাক বার্ষিক মূল্য ৪/- প্রতি সংখ্যা ১৭/-

প্রকাশিত হইয়াছে

- ১। পৃথিবীর জন্ম
- ২। প্রকৃতির পরাভব
- ৩। কামুর কীর্তি
- ৪। আর্ঘ্য ও অনাৰ্ঘ্য
- ৫। আজগুবি জন্মকথা
- ৬। ছেলেদের বিষ্ণুপুরাণ
- ৭। গল্পে রামকৃষ্ণ
- ৮। সত্যযুগের কথা
- ৯। উদোলবুড়োর সাঁওতালী গল্প
- ১০। রামকৃষ্ণের আরো গল্প
- ১। সতী
- ১২। উদোলবুড়োর আরো গল্প

